

四庫全書

集部

欽定四庫全書

集部

文敏集卷六

七

詳校官編修_臣裴謙

中書_臣劉源溥覆勘

總校官中書_臣朱鈐

校對官學正_臣常循

膳錄監生_臣鄧以伊

欽定四庫全書

文敏集卷六

明 楊榮 撰

七言律詩

送張大尹之建陽

東館編摩近一年清時多士羨才賢書成已荷恩光重
命下還聞邑政專匹馬蕭蕭辭北闕雙鳧杳杳向南天
建陽此去誰云遠士庶歡迎錦水邊

送王太守之肇慶

瓊州太守舊推賢
此日承恩及暮年
五馬行逢淮甸雨
雙旌重拂嶺南烟
都門莫惜金樽盡
故里仍看畫錦還
移郡喜聞民事簡
好將德意重敷宣

送僉憲王彥修之四川

幾年青瑣荷光榮
今日承恩出帝京
玉節遙持霜氣肅
繡衣初絢日華明
都門酌酒寬離思
憲府臨民藹政聲
莫道巴川西去遠
錦城父老喜相迎

圍獵

關塞霜清曉色明
鑾輿校獵出邊城
六龍扶輦旌旗合
萬騎連營鼓角鳴
遠火依微秋草薄
驚沙寂歷暮雲平
小臣躬覩三驅樂
願效嵩呼播頌聲

送義門鄭御史致仕還鄉

栢臺珥筆久推賢
喜見辭榮及暮年
天語丁寧恩賜厚
宸章璀璨墨華鮮
幾年守職風霜凜
奕世同居孝義全
總謂田園歸興好
丹心猶戀五雲邊

送饒僉憲之陝西

聖代掄材擢俊賢
乘驄馬向秦川
綉衣行部臨關內
玉斧承恩在日邊
隴樹總迎霜氣肅
塞雲多與曙光連
方期此日宣恩德
西土黔黎樂晏然

送弟尚文回南京吏部

遙持使節自南來
闕下相逢喜色開
風雨夜床情不盡
池塘春草夢初回
封章已進天顏悅
尊酒頻傾驛騎催
惟有新圖將別意
雲山千疊倚崔嵬

送呂僉憲之福建

七閩南去路漫漫又喜承恩戴豸冠
驄馬去時逢雪霽繡衣行處帶霜寒
遙知攬轡澄清易惟惜臨歧話別難
翹首雲霄鵬鷺勁草中狐兔豈能安

送熊自誠南歸

都門楊柳綠如絲相送臨歧惜別離
九陌鶯花催淑景一生湖海識襟期
白頭就養看賢嗣青眼交游總故知
聞說江南多舊業石榴花發到家時

度野狐嶺

山頭一望一岩堯四月寒岩雪未消使節有光南國重
征裘無暖北風遙心知聖壽齊三祝目極祥雲麗九霄
共荷恩波同覆載只慙無補聖明朝

次興和舊城宴別夷人

聖主尊居四海寬天教頑梗自相殘山河一視乾坤大
日月重熙社稷安中使丁寧宣聖德遠人拜舞罄交歡
何須更勒天山石萬古神功自不刊

度居庸關

居庸峻絕自天成鳳翥龍驤壯北京猛士防邊嚴警柝
行人駐馬聽泉聲雲連幽薊千峯立地接華夷萬里程
聖代車書今一統遐方無事樂昇平

自宣府至德勝關

千岩萬壑擁層雲持節南來日正曛關塞有兵嚴號令
屯營無事樂耕耘人家多在城中住流水還從澗裏分
共喜華夷今一統萬方咸戴聖明君

培山書堂

知君華構倚培山，泉石清幽几席閒。
挿架喜看黃卷積，鈎簾應待白雲還。
廟堂此日陪伊傅，燈火當時話孔顏。
未得投簪詢舊業，畫圖空自憶鄉關。

送魏則誠復任霍丘

故人別久動遐思，此日重逢話舊時。
百里編氓勞撫字，一壺美酒見襟期。
花飛客路鶯啼早，柳拂官橋馬去遲。
遙望淮山青一髮，臨分還寫送行詩。

送葉文翰致仕還鄉

別去鄉園二十秋
喜承優詔賦歸休
衡門松菊勞歸夢
朔雪關河憶舊遊
詩卷已知裁蜀錦
客裝寧惜敝貂裘
遙知紅樹溪邊路
應有諸孫待臈舟

送王檢討使朝鮮

海外諸番入貢頻
懷柔有詔命儒臣
俗傳箕子封疆舊
人仰皇朝德澤新
蜃氣晨消霞散綺
鯨波夜度月如銀
遙知稽顙歡迎處
共祝鴻圖億萬春

陽山看碑和胡祭酒韻

退朝連騎出嚴關
曉霧濛濛拂面寒
村落喜從行處見
江山如向畫中看
岩松凝翠森晴蓋
籬菊浮香簇露團
皇祖聖靈端有在
穹碑萬古樹嶺岏

題蔣御醫永思堂

馨欬茫茫杳莫聞
高堂揮涕幾晨昏
烝嘗敢廢如存禮
鞠育難酬罔極恩
獨鶴下時風滿樹
慈烏啼處月當門
幸承遺澤膺天寵
祗罄丹衷慰九原

駕送總兵官征交趾隨侍口號二首

大駕宵嚴出近畿
茲晨遣將討南夷
金螯耀日朱旂繞
綵鷁乘風畫槳齊
已見兵威消瘴癘
遙聞黎庶望雲霓
從征士卒皆歡躍
應有詩人賦采薇

拜領金符出玉墀
風雲絢綵動征旗
孤城狐鼠歸神筭
萬竈貔貅屬指麾
獻捷佇聞馳露布
誓師先見仗天威
凱旋宴饗論功日
清廟長歌出牧詩

交趾進白象

萬方入貢列殊珍
復見南來白象馴
瓔珞淨垂珠露濕

寶鞍高襯錦衣新
周岐不必誇丹鳳
漢苑寧須羨赤麟
聖世屢符祥瑞應
會看龍馬出河濱

陟岵卷

一官監牧久辭家
客裏思親鬢欲華
遊子寸心憂已切
故鄉千里路猶賒
白雲天際孤飛處
萱草堂前幾度花
畫錦何時歸養日
壽觴潋灩泛流霞

送李侍書赴廣東僉事

揮毫久任紫薇郎
此日南遷佐憲綱
朝佩正辭天闕曙

繡衣猶帶御鑪香都門臘酒催行旆水驛雲帆促去航
遙想下車炎瘴息梅花滿樹月如霜

水竹居

高人結屋枕清流
蒼竹森森景更幽
風戛秋聲來几席
月搖波影漾林丘
身中道義真堪樂
世上功名澹不求
早晚鶴書應赴隴
未容心跡繼巢由

岷山圖

岷山遙對錦官城
遊子看圖感宦情
松樹吟邊滄海近

杜鵑啼處白雲生
思親客夢三更月
聽雨鄉心萬里程
佇見政成歸省日
庭闈白髮沐光榮

敬亭山圖

宣州城北敬亭山
長日孤雲自往還
兩水秀分雙練白
九華青鎖一眉彎
林間竹韻鸞凰語
石上苔紋虎豹斑
五馬已知從此出
錦衣光彩照親顏

城南耕隱

縣城南面結茅廬
日事田疇樂隱居
白髮自甘生計拙

青雲無夢世情疎
身隨野老同來往
意與岩雲共卷舒
已喜豐年多稼穡
不妨燈火讀遺書

題閩嶺春晴送貢生劉景韶之京

嶺雪初晴麗景遲
送君北上望京師
江山幾處留詩卷
花竹誰家見酒旗
壁水登名良不忝
瓊林錫宴更深期
顯揚自是平生志
何用臨觴歎別離

送沙同知赴祿州

大江南去路迢迢
王事驅馳豈憚遙
幾處雕題通象郡

千年銅柱過龍標
山城雨歇蠻烟淨
海市風清蜃氣消
莫道荒郊叢竹外
思明經古戴皇朝

雙桂圖

亭亭老桂翠連拳
秀對書軒過百年
清影轉時隨兔魄
好花開處散龍涎
栽培欲奈風霜久
長養應承雨露偏
知子不忘先世澤
晨昏攀望思悠然

題杏林春曉圖

十年種杏已成林
知子能存濟物心
萬樹綵霞凝艷色

滿園晴旭散清陰紅芳浥露鶯啼密丹實垂金虎卧深
多少疲癢沾惠澤看圖聊為發長吟

和胡學士韻四首

玉署岩堯禁苑西石渠天祿勢相齊雲霞絢綵當窓近
奎壁廻光照席低天闕喜同聯劍佩仙家何必羨刀圭
鶯聲恰似簫韶曲時聽綿蠻隔樹啼

休將青鏡惜流年身在瀛洲即是仙視草每教依玉几
簪花常得侍瓊筵宮羅疊雪頒時服宣管含雲拂御箋

解賦清平須閣老幾番新調滿城傳

兩京長許從和鸞盛世賡歌興豈闌在藻賦餘欣錫宴
伐檀誦罷愧徒餐只慚淺薄叨陪久總謂明良際會難
葵藿有心終向日蒹葭歲晚獨禁寒

風裊爐烟散水沉隔簾千樹晝陰陰廣寒雲氣通西苑
長樂鍾聲出上林瑞日迴浮雙闕近彩雲低覆百花深
承恩未效涓塵報願共寅恭罄夙心

送鄒庶子還京

長陪鶴駕侍東朝又喜承恩在九霄報國丹心常耿耿
逢人白髮已蕭蕭兩京遊覽山河壯匹馬經行道路遙
歸到金陵逢故舊為言雲樹思偏饒

三秀

積善由來慶澤垂名家屢見產靈芝已聞毓秀當前代
又喜呈祥際盛時金采輝煌承曉露玉文璀璨絢晨曦
太平自是多嘉應好掇英蕤獻赤墀

送鄭御史致仕還金華并序

永樂己亥夏四月致仕監察御史鄭公幹偕其弟致仕
蜀府長史楷恭遇萬壽聖節自金華入覲皇上念其
出于義門既賢且老復能躬詣闕下以致其誠敬特賜
宴于殿廷又賜以楮幣并為善陰隲書慰勞甚至
朝之公卿大夫見公兄弟遭遇於聖明之世者如此之
盛何其幸歟榮忝有斯文之好於其歸也賦詩以贈
之

驄馬才名出義門懸車深荷聖君恩朝天共祝南山壽

歸日頻傾北海尊
驛路飛花隨去旆
都亭垂柳拂行軒
到家喜得陳恩賜
猶有鄉閭故舊存

慈節堂為吳母題

蒼松古栢伴孀居
苦節艱難二十餘
寶匣流塵朝鏡掩
青燈照影夜窓虛
承歡喜見斑衣樂
介壽還驚白髮疎
遙想高堂調膳後
春風花外度輕車

題周侍讀弟崇縉東園別墅

聞道林園景物新
山光水色繞簷楹
落花閒趁鉤簾入

好鳥時聽隔座鳴一徑綠陰知雨過半窓晴影見雲生
雅懷不獨幽棲樂兄弟登朝久擅名

贈尚寶丞袁忠徹陞少卿

兩世承恩寵眷隆地居清禁職兼崇君臣慶會時欣遇
父子光榮世莫同長侍龍顏仙仗裏每擎玉璽御筵中
鵷行屢得聯珂珮欲贈新詩愧未工

送政和傅知縣還任

朝天已得遂歸心相送臨歧思不禁潞水早寒冰久合

薊門騰盡雪尤深仙人自有王喬烏黎庶重聞宓賤琴
想到山城春已半停驂隨處是棠陰

皆山堂為南昌李時佐題

西山勝處說洪厓應似環滁面面皆丹洞雲深龍氣濕
翠屏風暖鳥聲諧窻前挂笏花園席膝上橫琴月滿懷
遙想當年稱壽日萊衣五色炫庭階

送錢僉憲之福建

百二山河攬轡頻又騎驄馬向南閩都門祖餞聯冠蓋

憲節光華動縉紳
荔子風清宜却暑
桃柳雨細不生塵
正當激濁揚清日
願奉皇恩慰遠民

題彭士揚慈訓堂

楚楚儒冠映綵衣
生平教育賴慈闈
十年燈下存丸膽
萬卷窓前想斷機
烏哺深恩時有待
鮭珍厚養志無違
曳裾已遂娛親樂
白髮還看衣錦歸

送胡訓導之新淦

安定孫枝世業專
除書遠下九重天
春秋筆法鳴昭代

月旦鄉評重壯年
芹草池邊新子佩
杏花壇下素琴絃
席珍莫負斯文重
他日蘇湖在淦川

題陳新冠山書屋

冠山深處擅清幽
窓戶沉沉黛色浮
碧樹白雲千嶂曉
青燈黃卷一簾秋
絃琴時弄梅花操
書字頻將柿葉收
好向英年勤學業
成名宜與古人儔

賀吳子尚母饒氏壽

芙蓉華蓋擁臨川
寶婺流輝照綺筵
壽屆七旬孀節苦

養霑三釜二兒賢北堂萱草春如錦西母蟠桃日似年
喜有文章昭善頌何須重續栢舟篇

題金幼學萬松亭

萬松深處結幽亭繞屋蕭森偃蓋青十里秋聲風瑟瑟
八窓翠黛畫冥冥雲橫老幹虬鬚奮露滴危巢鶴夢醒
幾度憑闌清興足半空竿籟月中聽

題胡廉使墨菊

誰洒溪邊洗墨痕東籬點染此花繁歲寒不改冰霜操

晚節偏承雨露恩
冷蘂開時詩滿卷
秋香泛處酒盈尊
殷勤持贈烏臺客
三徑懸知舊業存

送潘民止之温州

玉堂華髮老詞臣
鄉郡儒官寵命新
相見盡推前輩士
從遊總是故鄉人
粉榆醉後家林晚
芹藻生時泮水春
此去應知無限樂
四時海味足奇珍

送大尹李孔翼之任弋陽

一官迢遞大江西
把酒都門惜解攜
孤棹遠經秋浦驛

雙鳬遙向弋陽溪薦章已應丹書詔祖席還分綵筆題
好向山城敷惠澤循良應與古人齊

送判官陳季和之任安陸

十年載筆鳳池頭喜奉天書判一州薊北雨餘尊酒暮
江南水落片帆秋山城民朴安耕作澤國官閒樂宦遊
此去想應多善政他年風采動宸旒

和致仕祭酒胡公詩三首

江南歸老近何如別墅幽偏勝舊居濟世豈無經國術

消閒惟有滿床書
西山雨歇秋風後
南浦雲生夕照餘
二十年來同事者
退休應羨獨懸車

人生宦業似君稀
晚節投簪靜掩扉
撫景屢驚江燕語
緘情空望塞鴻飛
關河道遠心相憶
牛斗墟明劍有輝
訓子有詩仍借重
援毫揮洒見襟期

平生聲價重相如
况有文君慰索居
薊北謾嗟千里別
江南遙寄數行書
籃輿花滿春遊處
石鼎茶香午夢餘
遙想德星相聚處
二難持杖更將車

孔殿秋香為蹇舍人題

文翁興化重虞庠古桂蕭森覆孔堂地走蛟虬翻畫影
壁藏蝌蚪帶秋香枝頭金粟含芳氣葉底銀蟾耿素光
黌泮托根應得所年年花發比槐黃

京師八景

居庸疊翠

群山聳列勢崢嶸日照峯巒積翠明高出烟霞通絕塞
低回城闕擁神京休論函谷雙崖險絕勝匡廬九疊橫

扈從常時經此處坐看天際白雲生

玉泉垂虹

一派清冷蟬螭懸涵雲浴霧自年年聲迴曉闕鳴清佩
影落秋崖濕紫烟石罅轉來幽澗裏瑤池分出御橋前
汪洋長比恩波闊萬古東流會百川

太液晴波

太液清涵一鑑開溶溶漾漾自天來光浮雪練明金闕
影帶晴虹繞玉臺蘋藻搖風仍蕩漾龜魚向日共徘徊



蓬萊咫尺滄溟上瑞氣絪縕接上台

瓊島春雲

仙島依微近紫清春風淡蕩暖雲生乍經樹杪和烟濕
輕覆花枝過雨晴每日氤氲浮玉殿常時縹緲護金莖
從龍處處施甘澤四海謳歌樂治平

薊門烟樹

薊門春雨散浮埃烟樹溟濛霽欲開十里清陰連紫陌
半空翠影接金臺東風葉暗留鶯語落日林深過鳥迴

記得清明攜酒處
碧桃花底坐徘徊

西山霽雪

西山日上雪初晴
素壁銀屏萬疊明
高樹迎風飛玉屑
小橋流水澁琴聲
恍疑滄海通三島
絕勝崑崙見五城
但使年年足豐稔
桑麻燕雀遂生成

盧溝曉月

河聲流月漏聲殘
咫尺西山霧裏看
遠樹依稀稀雲影
淡疎星寥落曙光寒
石橋馬跡霜初滑
茅屋鷄鳴夜欲闌



北上已看京闕近五雲深處是金鑾

金臺夕照

獨攜尊酒上金臺尚想當時國士來
落木千章寒日下長空萬里暮雲開
春風寂寂飛桃李夜雨蕭蕭瘞草萊
却笑當時空買骨只今才駿總龍媒

送程大叅致仕還閩中

紫薇分省大江西叅佐如君世所稀
拱極正期同北向乞身何事獨南歸
關河杳杳孤帆遠江海悠悠一鴈飛

遙想到家行樂處白鷗相對兩忘機

送吳僉事致仕還閩中

外臺分職久知名心似冰壺徹底清攬轡早宣明主德
懸車今為故鄉榮秋風薊北征驂去夜雨閩南別思生
最是聖君恩寵厚到家還着繡衣行

送吏部黃宗載之南京

敷歷亨衢際五朝從來德望冠群僚南京獨秉銓衡重
北闕新承雨露饒遠道風高鴻已去長河霜降水初消

懸知耿耿丹心在松栢凌寒最後凋

送大理卿陳勉之南京

佐憲烏臺振百僚又承寵命下青霄鳳鳴朝旭鍾山近
鴈度秋空潞渚遙應擬有功傳異日還期無訟荅中朝
丹心一片知猶在莫道年來白髮饒

貞節堂

別鶴離鸞世所悲寒牕揮淚撫孤兒衰顏無復臨妝鏡
華髮猶聞服惡筭夜雨辛勤熊膽訓秋風惆悵柏舟詩

聖朝旌異隆恩典丹詔行看下赤墀

送彭琉僉事之廣東

翰苑編摩久著名喜承鶚剡出神京外臺共說乘驄好
故里爭看衣錦榮不獨秋霜清一道還期時雨化諸生
嶺南自此民風厚燈火絃歌處處聲

送康政僉事之四川

衣帶爐香出禁闈遠持憲節錦城西九霄勁翮橫雕鶚
五夜文光動壁奎去路想通秦塞近高名期與蜀山齊

輜車到處東風暖桃李陰陰綠滿蹊

送高超僉事之福建

栢臺衣繡舊儒紳此日之官向七閩御勅翔龍騰瑞彩
離亭征馬動芳塵萍芹漸逐清霜老壇杏應隨化雨新
為想南陲渾不遠即看佳譽到楓宸

題竹泉圖

青苔白石碧溪灣萬竹橫斜烟雨間雷奮忽驚龍化去
風生疑有鳳飛還佳人日暮羅衣薄稚子春深錦服斑

遙想家林應若此歸休未遂此身閒

東郭草亭宴集

萬方人樂太平辰朝退郊遊逸興新
近郭園林初過雨向陽花卉更宜春
蘭亭觴詠殊同調茅舍衣冠自絕倫
歲歲有期尋勝賞載歌既醉答皇仁

為僧題王牧之畫梅

牡丹國色桂天香獨有孤梅鐵石腸
國色豈如寒色古天香寧似暗香長
林逋佳句曾鳴宋何遜高情亦擅梁

歲晏伊誰是知己只留明月伴昏黃

送劉子欽致仕還鄉

才名獨步重當時宦路誰知與願違泮水十年憐遠別
關河千里惜重歸江南擬結耆英會天上曾聯列宿輝
話舊未能窮往事秋風分手思依依

送周式縣丞之東莞

除書朝下彩雲間晚歲承恩鬢已斑綠酒正憐官舍別
錦衣應喜故鄉還行經梅嶺青春早吟坐松堂白晝閒

佐縣想能施惠政頓令黎庶動歡顏

送御史方勉巡治兩浙

曉持憲節拜金鑾冉冉天香拂豸冠
霜氣凝寒明繡斧日華分彩上雕鞍
盛時已喜觀風好壯志寧辭攬轡難
到日貪殘應屏跡閭閻民物有餘歡

正統丁巳臘月望後大雪三日聖情悅懌賜黃
封內珍已而楊公弘濟賦七言律一首予勉
賡韻用識其事云

聖治無為德澤長豐年降福自穰穰臘前密雪昭和暢
天際同雲布渺茫玉屑瑤花應作瑞赤麟丹鳳謾稱祥
廟堂何幸陪芳躅思竭微忠日贊襄

和荅少傅東里先生

齒德俱尊冠百僚聖恩優寵免趨朝丹心炯炯雲霄上
白髮蕭蕭歲月遙弘化已推嘉績著論心長遣鄙懷消
明廷倚託今逾重肯許還山訪採樵

送陳祭酒復任南京

分韻得君字

考績新來謁聖君悠悠心事得重論未誇紫綬金章貴
且喜丹心素節存仕歷四朝名獨重望高六館德彌尊
東風浩蕩門牆闊桃李咸沾化育恩

和真率會詩

明時優老聖恩深雅會雍容集禁林列坐七人俱白髮
論思一片總丹心中朝文物真逾古東洛衣冠復見今
海宇昇平民物遂何妨痛飲和新吟

每念耆年洛社英合歡此日見高情生來已幸逢昌運

老至還欣際聖明
視草金鑒恩獨厚
論文玉署興逾清
乞歸未遂春將半
擬奉鸞輿出省耕

喜雨

聖主純誠格上穹
甘霖一洒萬方同
山川流潤昭祥應
草木回蘇顯化工
已喜三農歌帝力
頻令四海慶年豐
太平氣象今尤盛
贊理深期竭寸衷

文敏集卷六

欽定四庫全書

文敏集卷七

明 楊榮 撰

七言律詩

送訓導周進赴襄陽

除書朝下九重天
南去襄陽路幾千
祖席滿斟燕市酒
征帆輕颺楚江船
彤庭試藝逢昭代
絳帳橫經屬妙年
已喜難兄居禁密
名家伯仲總稱賢

題劉副使父寄綿詩後

官路思親日似年未寒先寄洛中綿衾溫不用爐煨酒
衣煖偏疑座有氈春透璽窩宜早起香生燕寢足安眠
詩成猶自憐輕費翻笑何曾食萬錢

吉郡劉君士皆僉憲河南時常附綿以奉親其尊甫
得之作詩并書以寄惓惓焉戒飭之意溢于言表真
賢乎哉士皆以九載考最陞廣東按察副使持此請
予和之且題之後嗟夫世之仕者其奉親惟恐弗至
爲之親者幸其子之居官亦惟恐其奉養不備此固

人之常情也若劉氏父子其可敬哉其可敬哉

送陳顏太守之惠州

平生清節廣文羶
鶚剡橫飛上九天
晴日且傾燕市酒
寒冰已阻潞河船
雙旗曉度消殘雪
五馬春行息瘴烟
料想先賢遺迹在
公餘遊覽憶坡仙

送謝良翰照磨赴建寧

盛世掄材擢有司
謝家玉樹共稱宜
雪殘鳩鵲辭京日
酒罷驪駒上道時
遠郡民風多樸厚
明時治化自雍熙

嗟余未得歸田野坐聽東南善譽馳

壽劉紳修撰母九十

人生七十已為稀況母年登九十期孝養正當娛暮景
恩封何幸際明時錦鱗斫鱸供調膳綠蟻浮香介壽卮
有子詞林歸未得南山遙祝繫遐思

送淞江按察副使江志堅復任

外臺佐憲遠馳聲考績趨朝報政成民在湖山俱樂業
人傳江海久澄清彤庭恩命催歸思紫陌離歌悵別情

當宁需賢資化理深期盡職竭忠誠

題長安歸騎圖二首

咸陽山水麗晴暉雲擁征番萬騎歸
奏捷九重嘉茂績分符萬里振兵威
柳搖暖色籠油幕花送春香上錦衣
未數燕然功獨盛他時汗簡更揚輝

元戎玉帳擁貔貅武畧文韜壓衆流
恢拓封疆當聖代盡收部落入神州
歸旌想愜輿情望奏凱親承寵渥優
從此烽烟空絕塞邊民樂業日歌謳

送侍讀曾鶴齡歸省

才高曾占甲科名官任詞垣獨有聲
載筆久看承雨露寧親今喜荷恩榮
長河風暖冰初泮故里花開日正晴
想見升堂頻拜舞滿傾春酒祝長生

賜榮堂為西江潛濱題

青春擢第冠賢良華構新成倍有光
喜著恩袍明獸錦恭承御勅煥龍章
山川總映雲霞麗草樹皆含雨露香
自是聖朝多寵數榮名從此重筠陽

仰高樓

西山高聳翠參天，傑構平臨出市廛。
風月晴分虛檻裏，星河暝落曲欄邊。
地連滕閣懷遺跡，望入徐亭仰昔賢。
最愛羣公多賦咏，文光夜夜貫奎躔。

東臯草堂為湯指揮題

草堂新構足幽情，半近平湖半近城。
堤上綠楊含曉色，雨中黃鳥送秋聲。
多因暇日觀書帙，總道安居荷聖明。
莫戀湖山多逸興，好思麟閣著勲名。

竹亭為王行儉令祖題

百年清望憶河汾人去亭空見此君
素節尚存知耐雪
新枝初長已凌雲
色侵苔徑紅塵隔
光泛芹塘翠影分
此日披圖重懷仰
無因林下挹餘芬

送羅照磨南歸

薄宦經年白髮生
遙辭嶺外覲神京
謝官自擬從元亮
抱病誰憐似長卿
要路青雲非舊夢
閒鷗野水有新盟
還聞三徑多松菊
相對秋風興轉清

和荅俊齋鄉先生二首

不羨蒲輪迓魯申豈圖黃閣畫麒麟
暮雲春樹無窮意鶴髮童顏尚健身
行誼已知超俗士才華真足任詞臣
山林自得優遊樂八十年踰又幾春

夙慕青雲志已申敢期瑞世比祥麟
恩榮有幸遭明主效報無能愧此身
位重公孤叨宰輔職兼翰苑忝儒臣
佳章遠寄逢新歲鳳歷初頒第五春

送廖自廉赴沅江訓導

捧檄趨朝鬢已蒼
儒官南去入沅湘
薊門祖帳逢朝雨
漢口征帆度夕陽
秋入楚山黃葉落
風生魯泮碧芹香
宦情莫厭寒羶薄
老去清閒興味長

送梁本之紀善赴魯府

魯從巴蜀輔親藩
零落堂萱泣血還
喜向孔林懷聖德
遙從魯國綴清班
曳裾時復臨沂水
拄笏多因望泰山
老去宦情隨意適
優游文翰樂幽閒

題趙尚書致仕

致仕還家鬢似銀都門冠蓋送行塵真卿持憲聲華舊
廣德懸車寵渥新閭里達尊推雅望耆英高會繼前人
殿廷慣識尚書履別後還期覲紫宸

寄中書許鳴鶴

鳳池昔日獨辭榮未盡都門送別情南國雲橫天萬里
西垣月落夜三更身閒尚想丹心在老去寧憂白髮生
衰倦只今慚我輩何時洛社會耆英

題竹送僉事孫欽之江西

幾年攬轡大江西十郡山川入馬蹄雅操已為當世重
貞心應與此君齊葛陂自昔聞龍化憲府于今有鳳栖
暇日臨圖更清翫風霜秋色正堪題

題孫僉事山水圖

繚繞雲山倚碧空畫圖疑與輞川同何人放棹烟波裏
有客攜琴夕照中綠樹清陰迷遠近小橋流水自西東
幽偏祇可耽佳興未許門留憲府驄

題蘇武忠節圖

海上羈窮茹雪糴羝羊不乳竟誰憐十年身受風霜苦
一寸心同鐵石堅虜塞獨持龍節在漢家豈料鴈書傳
河梁泣別生還闕始信孤臣節誼全

宋舒城李龍眠寫漢蘇子卿忠節圖而文正諸公繼
以詩厥後文信公天祥又識其首迄今幾四百年而
河南左布政使盱江饒君得之攜來京師示余嗚呼
忠義在人心萬世如一日也子卿居匈奴十九年卧
起持漢節仗義不屈信公當宋運之去蹇蹇匪躬之

日一覽此圖慷慨激烈有去國思君之念蓋公之心
即子卿之心所謂易地皆然者也第子卿之生還信
公之死義有幸不幸焉耳彼甘心降虜忘國背君徼
富貴於一時者視二公為何如饒君生長江右文獻
之邦出膺方伯之任於忠義之道講之有素又得此
而寶之誠可謂知所重者矣因其請故賦詩一首書
以歸之

送知縣羅永年復任崑山

昔承薦剡別鵷班墨綬銀章出九關
花縣已聞宣聖德
楓宸今喜覲天顏
去逢梅雪年華逼
歸到琴堂晝景閒
隱隱碧霄千里外
郎星垂彩照崑山

郊祀恭侍大駕宿齋宮有作

六合塵清化日熙
南郊有事致齋時
煖回玉殿春光早
漏轉銅壺夜景遲
五色雲霞依鳳輦
九天星斗映龍旂
侍臣肅睦惟瞻仰
滿袖天香近紫微

虎旅龍驤列兩階
翠華今夕駐蓬萊
聖心亶亶祈天眷

星象森森拱上台已喜祥光調玉燭更看和氣藹春臺
禮成明日同稱慶歌頌無能愧謏才

送李永年叅議致政歸鄉

叅佐藩維鬢久斑投簪今喜故鄉還身辭北闕紅雲下
家住南城碧水間籬菊未荒三徑在沙鷗相對一心閒
有時半醉西窓裏簾捲秋風望遠山

茂恩堂為熊經歷題

烏紗珠翟煥庭闈齊慶年高白髮稀天上雙龍蟠御勅

人間五綵絢斑衣
椿林不為風霜老
萱草偏資雨露肥
自是聖恩深似海
此生忠孝願無違

送按察使章聰之廣西

象笏朱衣獬豸冠
除書榮捧別金鑾
九秋鵬鷃凌空舉
五嶺風霜動地寒
才大已為明主重
政行當得遠人歡
還持歲晚松筠操
留取高名異日看

送李太守致政歸鄉

分符幾載守維揚
喜有能聲達帝鄉
報國尚思葵向日

乞身偏覺鬢成霜五湖天遠鴻初舉三徑秋深菊未荒
歸去想應無俗慮閒居猶得頌虞唐

題兵部主事鄭厚兩峯白雲圖

兩峯峯上何所有來往白雲閒自飛
英英不逐海風散冉冉應隨山雨歸
身寄宦途長在望心懷親舍久相違
好似梁公盡忠孝名垂青史永光輝

和少保楊先生退食之作

皇仁廣大與天同萬姓咸歸覆幬中
任重未能弘聖化

才疎深擬效愚忠喜逢海宇文明日敬仰中和位育功
制治保邦明訓在退朝憂思倍忡忡

題竹送按察副使嚴繼先

誰將修竹倚雲栽翠色清陰繞憲臺彩鳳羽毛迎瑞日
蒼龍頭角起春雷不隨仙仗波間化應感簫韶闕下來
向曉好風吹綠玉珊珊珂珮在蓬萊

賞菊

佳菊栽培近玉堂花開今喜應重陽貞姿肯逐秋光老

翠色偏留晚節香久向禁垣承雨露還同栗里傲風霜
移來翫賞逢清暇為爾多情數舉觴

為爾多情數舉觴七人對此興偏長日臨佳色通青瑣
風引清香散玉堂已喜四民皆暇豫更看百辟盡才良
自慙老去成疎懶未信食英力更強

挽胡祭酒兄

白髮江南老布衣青雲事業與心違平生詩酒人爭羨
滿眼芝蘭古亦稀濟世只因收藥物看山長是著荷衣

楚鄉千古思遺德馬鬣峨峨映落暉

挽王孟端

襟懷瀟灑晉人風翰墨流傳羨獨工
三峽波濤生筆下千山丘壑出胸中
蚤遊鳳沼聲名在久處詞林意氣同
今日淒涼歌楚些臨岐揮淚思無窮

挽胡景芳

盛世才名自昔稀曾看白髮到春闈
不教姓字題金榜空遣文章老布衣
五夜案頭螢尚在千年海上鶴應歸

蕭蕭落木文江路馬鬣寒雲鎖翠微

挽主事王洪

一夕悲風起夜臺蘭苕秀質倏傾摧九京已作騎鯨夢
半世空憐倚馬才蒿里淒涼朝露積錢塘寂寞暮潮回
懸知窮達皆由命始信馮唐最可哀

挽金鳳儀

儒官早遂少年遊繡斧光華繼馬周綵翮孤飛誇鷺鷥
霜蹄一蹶惜驂駟薦書方達黃金闕召記先登白玉樓

碧嶂清江家萬里西風旅櫬在歸舟

挽宋尚書

早有聲華著外臺還陪宗伯見多才
垂紳已喜登廊廟聽履應宜位鼎台
遙望旌麾雲外去俄驚旅櫬峽中回
九重紫誥隆褒贈不獨生榮死亦哀

挽鄭長史

輔導親藩早著聲至今清望重鄉評
無人載酒詢奇字有子登朝播令名
華表鶴歸秋月冷空山馬鬣暮雲平

為公展卷思遺德忍賦招魂倍愴情

挽古尚書朴

華髮蕭蕭坐廟堂南京政簡足徜徉明時共喜芳名播
晚節欣逢泰運昌已荷恩榮頒紫誥寧期夢寐入黃梁
司徒清鑒當時重簡冊他年定有光

挽松齋

羨君高誼與誰倫自昔芳名動縉紳道拾遺珠還故主
廩捐積粟賑饑民烏聲雜雨山花落馬鬣封雲墓草新

賴有諸孫能繼述
身冠文采映青春

七言排律

送僉憲王孟堅之江西

蕭散鄉園已數秋
又承徵詔別林丘
詞垣簪筆榮名久
憲府乘驄寵渥優
衣繡三秋辭北闕
觀風十月到南州
明時文運昭奎壁
御勅龍光貫斗牛
興學正期追往古
育才端擬繼前修
外臺五夜秋霜肅
泮水三春化雨周
共說松筠清節勁
更期桃李綠陰稠
西江自昔推文獻

料得明珠不暗投

送周職方致仕還鄉

字水仁山是故鄉先朝簪紱有餘光
道宗茂叔家聲遠
派接礪州世澤長
分職王門多諫諍
橫經泮水育才良
蒹葭已歷秋霜老
桃李曾沾化雨香
秩轉成均秦博士
名高粉署漢仙郎
握蘭久著金閨籍
投老先辭玉笋行
天上正期星北拱
雲邊驚見鴈南翔
五湖歸去舟應遠
三徑行吟菊未荒
晝聽松風閒偃仰
夜看蘿月自徜徉

二疏漢代高風在九老香山俗慮忘此日分攜歌白雪
滿頭素髮陋馮唐

七言絕句

題邊文進花木翎毛

翠袖逢春自不寒湘江雲散水漫漫飛來青鳥知何處
誤作仙源樹裏看

墨菊

聞道柴桑景最幽晚涼清興到林丘墨池一夜西風起

染出東籬一片秋

題扇面小景

一川澄練石梁孤隔岸
雲林過雨餘松下老翁應有待
穀城何處更傳書

石橋流水帶斜暉
應有人家隔翠微
坐久不知明月上
露華偏濕薜蘿衣

題畫

誰家老屋枕溪濱
十里青山半是雲
此處更無塵跡到

祇應啼鳥隔花聞

小橋流水漾晴沙杖策歸來日未斜昨夜東風花落盡
一林高樹鎖烟霞

題四景畫

十里晴山景嶂開水邊花木映亭臺此中風景應無限
自有蘭舟載酒來

溪頭垂柳拂青絲溪水粼粼漾碧漪想得幽居多勝處
芰荷風細雨涼時

萬疊青山隱薜蘿千尋瀑布落銀河白雲冉冉生衣上
紅葉離離滿澗阿

千仞瑤華擁翠巒深深林密玉光寒輕舟一棹歸何處
疑是山陰月夜看

題雪梅

姑射仙姿不浣塵還教滕六助精神那知一段冰霜態
付與時人為寫真

題折枝翎毛四首

片片紅霞入臉勻粧成穠艷照青春山禽亦有風流意
畫得雙蛾八字新

右山桃畫眉

梔子花開素影低
哨雛野雀趣幽棲
上林更是春光好
莫與鷓鴣飲啄齊

右梔子寒雀

不肯低飛向野蒿
從來棲息愛清高
廣寒無數黃金粟
吹得天香入羽毛

右木犀鵬鴒

翡翠叢深雪霽遲一枝冷蕊鬪瓊肌十年不到羅浮洞
又是參橫月落時

右梅花翠禽

題畫

幾樹垂楊覆小亭雙雙白鳥度雲屏飄然一棹來相訪
正是山人午睡醒

紅白山花相暎開山中徑路久無媒老翁不是看花客

只泛扁舟載酒來

遙看瀑布落寒汀
野服烏巾自在行
好似匡山讀書處
滿林紅葉夜猿聲

千林萬壑凍無聲
一棹夷猶溪上行
興盡歸來卿莫笑
多情何似不留情

五馬圖

霜蹄霧鬣氣騰虹
日並天開十二中
自是清時無戰伐
四郊首宿老西風

題子昂竹

自是吳興筆法奇琅玕隨意墨淋漓幾回猶憶吹簫處
正是秋山月落時

栗圖

山果經霜欲熟時苞如刺蝟碧參差早知戰慄承天意
不遣龍沙涕淚垂

五馬圖

天閑五馬最雄奇萬里驍騰識駿姿龍種自應充內廐

豈同凡馬謾驅馳

題菜

淡蕩東風二月初過畦春雨長嘉蔬薺鹽自是先賢事
猶有清芬在畫圖

題十八學士

退直從容出禁林如何託興在瑤琴
願彈解愠南薰曲
不待知心識賞音

右琴

金史卷之八
清擬蓬瀛海上洲閒將勝負決紋楸笑談咫尺心千里
一似留侯默運籌

右棋

筆底雲烟落素屏金輝玉潤勢逾清看來定是虞文懿
獨擅臨池萬古名

右書

弘文館下論思餘徙倚臨風看畫圖舉目河山今一統
經營曾是贊良謨

右畫

題竹贈教諭胡舟

數枝瀟灑翠烟濃
玉立亭亭泮水東
遙想絳帷開講處
諸生應得被清風

題竹贈弋陽令

誰種扶疎一兩竿
晴梢裊裊舞青鸞
西風忽送瀟湘雨
散作琴堂九夏寒

題竹

雨過江頭夕照收
蒼苔白石自清幽
不知昨夜蛟龍起
化作瀟湘一片秋

海上移來恠石奇
綠雲深處竹猗猗
雨聲昨夜春雷動
應是神龍化葛陂

涼雲晴壓綠枝低
澗底珊瑚長欲齊
愛對繁陰清似洗
幾迴掃徑獨留題

辭

思親辭三章為陳長史賦

有序

唐府長史陳範字文範幼隨父避寇居惠陽父沒時年十五女弟三人俱幼弱值歲饑賴母謝氏紡績織紵以給衣食且教且育暨歸龍川遣範為邑庠生于時男女婚配各克成立永樂乙酉範領鄉薦明年登乙榜教諭湖廣麻城於是迎母就養嘗述其母子艱苦之由作詩三章名曰戲彩曲遇母壽旦及時序或公退之際輒具酒肴以奉率諸子歌是詩而舞務得母之歡心後教授於衡所以奉其母者一若麻城時母

歿服除來京特承天恩授以今職誠不次之擢人皆謂其孝感所致間來謁予出其所謂戲彩曲者欲請賡其意予重其母之賢而嘉範之孝因作歌辭三章以荅之名曰思親辭使歲時伏臘祭享可歌以侑奠不惟有以舒範之孝誠抑亦可慰其母於九泉之下云其辭曰

嗟陳母之早寡兮遭家流離避地惠陽兮歲且薦饑遵夫君之命兮保此孤兒旦不停績兮暮不停機貞心耿

耿兮誓天弗違念故居之難舍兮攜子來歸遣之就學
兮于彼泮池幸子有立兮祿養逮時母今弗見兮子心
傷悲永言孝思兮寧有窮期

悲陳君之失怙兮子立煢煢母氏鞠育兮劬勞莫勝策
名登仕兮母所成迎母就祿兮孝之徵稱壽觴兮旨酒
盈舞膝下兮斑衣熒祈天祐母兮百歲康寧天不慙遺
兮溘然遐征北堂寂兮秋月明想馨歆兮慕容聲水可
涸兮山可平悠悠罔極兮人子情

資母以生兮人誰不然嗟君有母兮其德孔賢中壽遽
止兮胡不百年司造握柄兮匪人能遷遐思往昔兮當
壽筵舞且歌兮衣蹕蹕幽明杳隔兮相見無緣舊曲徒
存兮歌聲靡傳盼東山之梅村兮有高其阡撫春秋以
祭奠兮有淚如泉淚如泉兮目涓涓孝子思親兮永弗
諠

寄致政修撰張宗海

有美一人兮蘇之陽昔嘗鳴珂振珮兮班鵷行遨遊金

門兮步玉堂
纈雲為衣兮霞為裳
食綺食兮酌天漿
鳳鳴兮于高岡
振翮一去兮倏遠翔
想優游于里閭兮
杖屨徜徉我身弗羽兮
徒引領而南望

我所思之人兮蘇之濱
自我不見兮今幾春意
其與雲鶴為侶兮泉石為鄰
吟風弄月兮其樂無垠
寄我以辭兮祝我誕辰
披緘閱視兮如獲兼珍
人可想而不可即兮
情曷以申
維雲有鴻兮維江有鱗

送黃大尹之廬江

君世家兮江之西聯簪纓兮紹弓箕學有得兮才有為
名所傳兮人所知乃膺薦兮官貴池欲與聚兮惡勿施
撫鰥獨兮卹孤嫠風禮讓兮絃歌詩徭役均兮耕牧時
桑柘茂兮蠶績宜饑得食兮寒得衣吏不見兮犬生羆
嗟古之人兮疇與齊召父杜母兮應可期

二

君今往兮于淮之涯民皆赤子兮地皆王畿官不遷兮
心靡移終厥美兮慎所持諒公道之昭兮人莫為爾之

是非顧富貴在天兮而顯晦之有時維職弗鰥兮素餐
之免譏循吾素分兮奚較乎崇卑淮山青兮淮水流漪
勗哉崇德兮毋謂莫我知

鄭侍郎父哀辭

嗟美人之居兮荆山之陽詩書之林兮禮義之鄉學底
于成兮為德孔良永玉其潔兮椒蘭其芳甘肥遁之優
逸兮躬芟衣而荷裳紛鸛表之屢薦兮爰分教于邑庠
有如時雨之化兮芳菲菲其彌章繼茂膺於寵命兮宰

百里之封疆冽寒泉之澄澈兮湛秋月其流光邈卓魯
之已遠兮偉政績之可方撫桑榆之既迫兮樂退休以
徜徉羌復徵而效用兮羨教鐸之載揚慨日月之不淹
兮奄一疾其云亡喜鳳毛之騰彩兮麗雲霄而高翔恩
光賁于幽壤兮祭龍章之煌煌死而弗朽兮其存者長
慶流後嗣兮奕世其昌

文敏集卷七

欽定四庫全書

集部
文敏集卷八

詳校官編修_臣裴謙

中書_臣劉源溥覆勘

總校官中書_臣朱鈐

校對官學正_臣常循

謄錄監生_臣鄧以伊

欽定四庫全書

文敏集卷八

明 楊榮 撰

賦

皇都大一統賦

有序

洪惟聖天子龍飛當天下一統聲教所暨無有遠邇
咸樂清寧乃猶夙夜孜孜思所以紹承太祖高皇帝之
先志於是做成周卜洛之規詔建兩京以肇國家萬萬
世之鴻基以開天下萬萬世之太平甚盛舉也況北京

實當天地之中山川形勢之壯帝王基業之盛莫逾於此由是車駕累經巡幸宸謨睿算上合天心昭孚祖考百神協順川嶽效靈故自經始以來嘉祥駢集靈貺昭荅而中外臣庶百工衆伎之流罔不懽忻子來樂於趨事而皇上擴天地之量戒之以勿亟撫之以厚恩賚錫駢蕃慰諭備至不數年間厥工告成以今年春正月朔旦皇上御奉天殿朝百官凡内外文武群臣與夫四方蠻夷酋長來覲于廷者莫不懽忻踴躍以為氣象宏

偉規模壯麗卓冠千古真足以臨四方朝萬國實為聖
壽萬萬年鴻福之徵宗社萬萬年磐石之固聖子神孫
帝王萬萬世隆長之慶也猗歟盛哉臣備員侍從覩茲
盛美敢不鋪張其事以昭示於無窮焉乃為賦一篇述
其大槩謹拜手稽首以獻其詞曰

維皇明之有天下也於赫太祖受命而興龍飛淮甸風
雲依乘恢拓四方弗遑經營既渡江左乃都金陵金陵
之都王氣所鍾石城虎踞之險鍾山龍盤之雄偉長江

之天塹勢百折而流東炯後湖之環繞湛寶鏡之涵空
壯江南之佳麗匯萬國之朝宗此其大畧也迨于聖皇
嗣大一統剛健日新聰明天縱囿四海以為家登羣賢
而致用思繼志之所先惟都邑之為重於是天意鑒觀
人心和同神靈效順龜筮協從既應天以順人爰辨方
而正位視往聖而獨超繼高皇之先志乃相乃度載經載
營眷茲北京山川炳靈其為形勢也西接太行東臨碣
石鉅野亘其南居庸控其北勢拔地以崢嶸氣摩空而

崩劣復有玉泉漫流宛若垂虹金河澄波雪練涵空膏
渟黛蓄浩渺冲融包絡經緯混混無窮貫天河而為一
與瀛海其相通爾其派連析津源分潞水既環抱以縈
迴亦瀰茫而清泚來職貢於四方通檣帆於萬里至若
王畿之內輦轂之間沃野彌望原陸寬閒烟火相接雞
犬相聞宵無警柝外戶不關以牧則蕃以種則獲以佃
以漁以耕以鑿隨其所營皆得其樂而其為都也四方
道理之適均萬國朝覲之所同梯航玉帛為都邑之會

陰陽風雨當天地之中爰勅臣庶爰伐材木南浮湖湘
西入巴蜀斧披虹霓聲撼山谷徂徠之儲新甫之蓄榱
楠杞梓杉櫨檉櫟梢橫青天根連地軸鉅細畢輸長短
悉錄駕雲車之百輛振龍驤之萬斛紛紜輻湊彌布川
陸厥材之良不一而足若乃美石比玉從古所稱瑩者
如圭潔者如瓊溫者若璐潤者若瑛以磨以礱乃堅乃
貞鏗林振壑馳飈驚霆千夫所攻萬里啓行山靈助其
光華坤后發其精英豈硤硤之敢混實寶玉之爭呈若

夫坎離播功坤艮合德出於陶冶成于埏埴飛紫微於
半空結祥烟於八極或規以圓或矩以方絜琉璃之一
色耀文采於中央或肖形於獸吻或擬質於鴛鴦於是
良時載啓吉旦既卜臣庶駿奔滄若雲蠡源源其來登
登其築百堵皆興萬夫相屬行若魚貫立若鱗蹙斧斤
揮霍尺度攢簇由是貴育效力公輸獻奇曰爰曰斯伯
與暨倬攄厥巧思運厥神機各效其能以見於為顧小
善之並錄矧妙伎之或遺羣材礪磊以山積鉅棟騰躍

而輦飛爾乃九門洞開三殿攸建觚稜雲聳丹漆霞綢
輦路逶迤閣道迴轉華蓋屹立乎中央奉天端拱乎南
面其北則有坤寧之域乾清之宮璇題耀日寶柱凌空
金鋪璀璨綺䟽玲瓏珠玉炫爛錦綉丰茸歲莖起鳳天
矯盤龍千門瑞靄萬戶春融其南則有午門端門左掖
右掖丹闕峙而上聳黃道正而下直豁大明之高張屹
正陽之拱挹繚周廬之穹崇蔽重甍之護翼其左則有
宗廟之祀以奉祖考仰在天之神靈隆萬古之尊號謹

歲時之烝嘗薦純誠於蘋藻其右則有社稷之靈以崇
祀享汎壇壝之肅清通神祇於肸鬯爰春祈而秋報用
昭荅於靈貺若夫乾清之前門列先後日精月華之對
峙景運隆宗之並構謹身翼乎其前仁壽屹乎其右又
有奉先之祠大善之殿文樓武樓之特聳左順右順之
並建若乃震位毓德文華穹窿亦有武英實為齋宮有
天財寶藏以貯珍貨有大烹光祿以典殮饗寶善在左
翼翼思善居右而崇崇若夫欽安之後珠宮貝闕藻

綉文耀雕櫳窺窠六宮備陳七所在列親蠶有館繅絲
有室二南詠歌播于篇什輔德相成風化洋溢皇城之
外殿宇魁渠有翼有嚴太孫之居金水之濱瑤階玉除
梁棟巍巍上凌太虛為諸王宮翊衛皇圖星羅棊列以
臨九衢至若文淵之閣祕書之府纂述乎今儲蓄乎古
汗牛充棟莫知其數牙籤迺邇緗帙旁午粲奎壁之上
連赫虹霓之夜吐若夫飛閣戕戕實為承天綉楹霧簇
畫拱星聯踞石貌之盤礴竦華表之歸然至若南郊之

設特超古制圜丘方丘不岐以二合祀於中父天母地
壇分內外二十有四羣祀有典百神有位惟我太祖寔
配上帝乃歲孟春三陽之始吉日斯蠲祀事有備薦以
粢盛泛以醴齊豆籩秩秩庭燎晞晞鼓鐘戒嚴鑾輿至
止儼對越以升中祝蕃禧之攸萃至若山川有壇先農
有祀馬祖旗纛各以時祭寅畏恪恭罔有弗至若夫稽
古建官為民之牧內外相承各率其屬至若黃門給事
青瑣仙班典內廷之封駁近咫尺之天顏復有文翰之

林詞藝之苑處嚴密之清禁列英華之妙選優游玉堂
之署出入金鑾之殿擅瀛洲之美譽承黼宸之清問至
若鳳池之職尚寶之司掌絲綸於紫誥典符璽於彤闈
有宗人以統天潢之派有銀臺以通喉舌之機若乃六
卿分職位躋台鼎贊廟堂之謀謨總藩方之政令至若
憲臺之任風紀是司誠耳目之所寄實法度之攸施若
夫都府有五軍政是宣奮貔貅之將士耀霜雪之戈鋌
保輿圖於按堵掃絕漠之烽烟至若都邑有庠辟雍有

學育才于茲以儲以擢若夫容臺典祀士師明刑錦衣
總夫儀衛巡警係於五城鴻臚謹朝謁之禮太僕司監
牧之名京畿布列於州郡田野參錯於屯營至若奉神
有祠報功有廟梵宇琳宮光輝朗耀倉廩之積如坻如
京露積紅腐陳陳相因鎧甲晶熒士卒精銳靡强弗摧
靡堅弗碎驂騑駟騶駟騶宛冀之駿渥洼之良充
乎內廄磊落騰驤又有福山後峙秀出雲烟實為主星
聖壽萬年層嶂疊擁奇峯相連鼓鐘有樓其高接天勢

若貫珠萬里綿延若乃朝市既成井邑斯列閭閻輻湊
闐闐有截豁九達之通衢羅萬室之如櫛富商巨賈肩
摩袂接北通朔漠南極閩越西跨流沙東涉溟渤來百
貨之縱橫雜輪蹄之填咽珠璣爛其輝燿羅綺煜其騰
沓至若青樓並峙綺榭相連妖姬窈窕艷女嬋娟穠妝
競倚粉黛爭妍引歌喉之宛轉迴舞袖之踟躕極酣嬉
於暇日窮勝賞於芳年至若太液之池萬歲之山澄波
漱滌層岫嶺岼開闔蔽虧縈帶迴環竦飛樓於曖曖敞

貝闕於岩端門臨碧蘚之磴橋跨玉虹之灣晴光出乎
軒檻飛翠洒乎闌干瞻廣寒之月殿撫桂樹之團團爾
其瑤草龍葱琪樹羃歷長松之蟠古栢之直修篁烟挺
老檜雲積瑰偉之姿奇異之植蓊然其陰嫺然其色宛
蓬瀛之在茲恍塵凡之遂隔至若上林衍沃靈囿逶迤
瀟以碧海湛以深池百草綠縹群卉芳菲寬閒薄乎禁
籞平廣屬乎坤維樂鱗介之游泳縱毛羽之離褫乃有
騶虞效祥麒麟表瑞白質黑章膚身牛尾神鹿貢於遐

方白象出於南裔脩玄兔之繼呈忽天馬之沓至復有
馬哈福祿厥獸殊形駝鷄之異白鳥之禎竒姿詭態率
舞縱橫隸首莫紀伯益難名至若地祇協順天心昭格
嘉祥疊臻靈貺蕃錫神木不運而自行祥氛煥發於巨
石忽靈蛇之前導現大青於沙磧瑞光煜乎半空卿雲
煜兮五色醴泉湧兮瓊漿甘露潄兮玉液靈芝產于碧
山景星見於南極禿千兔以難窮殫百喙而莫悉然而
歷觀前代迄于往古帝王所都難可畢舉豐鎬之美崤

函之固宛洛之奇汾晉之富雖或雄據於一時控馭於
中土而於今茲帝都之壯麗又豈可以同年而語哉迺
歲庚子告成厥功辛丑正旦方春和融聖皇御朝萬方
會同百辟卿士肅肅雍雍東西南朔罔不率從戴白之
叟垂髫之童且欣且抃拜舞呼嵩仰祝聖壽萬福來崇
慶此皇都佳氣鬱葱擴基圖於萬世偉壯觀於九重真
帝王悠久之業據山河表裏之雄然而聖天子以六合
為家以四溟為池以仁義為干櫓以禮樂為藩維不恃

險以為固惟在德之所施至和塞乎穹壤恩澤洽乎華夷致九有以寧謐躋萬國於雍熙此其所以德侔乎堯舜道合乎軒羲窮天地亘古今而莫能與齊也臣職禁垣叨蒙眷顧謏陋是慙涓埃莫補覩皇都之鉅麗壯宏規於往古潔泓潁於長辰陳盛事以為賦又從而為之歌曰翼翼皇都萬方之會兮聖德之宏實同覆載兮聲教所暨一統無外兮又歌曰皇都翼翼民之所止兮惟皇萬壽福祿無已兮聖子神孫寶祚萬世兮

三峯書舍賦

有序

建陽書林葉添德景達氏自其大父榮軒父彥齡世以詩書為業嘗作室以貯古今書版日積月增棟宇充牣凡四方有所購求者皆樂然應之由是縉紳大夫莫不稱譽其賢其室之外有三峯秀出霄漢望之巍然挺拔千仞嵐光翠黛浮動乎几席之間甚可愛也因名其室曰三峯書舍蓋景達之意其於群書不惟鋟梓以廣其傳而將欲俾其子孫耳濡目染無非道德之懿口誦心

維莫匪仁義之說然則書舍亦豈泛然而作也哉聞來
徵言於予予於景達素相知不可以辭乃為賦其事以
彰厥美云其詞曰

緊建陽之為邑實南紀之輿區仰紫陽之遺澤沐道德
之膏腴俗婉美乎鄒魯家諷誦乎詩書況山川之形勢
鬱磅礴而扶輿蠡三峯其突兀偉奕奕兮華居匪燕息
之是安乃版籍之攸儲嗚呼堯舜道遠素王有作刪詩
定書考禮正樂贊易理之玄微嚴春秋之筆削柰薄蝕

於戰國再焚絕於秦虐幸小復於漢代徒騁驚乎穿鑿
尚有賴於宋儒卒光明而表襮維紫陽之挺生實闡揚
夫正學溯淵源於洙泗踵軌轍於濂洛微詞奧義資之
以發揮六經群籍因之以充拓此三峯書舍之所由創
而千載斯文之是托也若乃其森若筍植高若凌空孤
撐兮峩岌並峙兮巖嵒挺根盤盤其數里翠冉冉其千重
青連武夷之秀勢壓雲谷之雄中有傑構重簷翬飛廓
乎宏敞翼乎蔽虧聖素是尚藻繪弗施圖史序列庋閣

逶迤如櫛之比如鱗之差名曰書林為世所資異孔壁之斷爛匪汲冢之怪奇上該乎皇王之紀下脩夫技藝之詞莫不俱收而並蓄旁積而靡遺實人間圖書之府宜海內購求者之交馳也嗚呼噫嘻世人金玉之豐寧若子圖書之蓄子家圖書之富寧若身誦習之篤究往聖之遺言籍先賢之賸馥日涵詠以優游羗潛心而佩服匪在躬之致勤課孫曾以私淑殆見鄧林之產終需梁棟之材渥洼之駿高奮雲衢之躅聲價昭乎前聞輝

光播乎鄉族益勉焉以自強諒子心之攸屬也

清白軒賦

有序

金華祝君存禮洪武中由太學生擢秋官主事歷河南
湖廣兩道按察僉事今為閩郡憲副自筮仕以來敷歷
中外幾四十年矣恒念家居遊學時其先君子嘗訓之
曰汝異日居官以清白自勵庶彰令名不然非所以為
學矣由是服膺訓言因以清白名其軒其後入仕果能
振揚風紀綽著聲稱不負所學且克承其先人之志惟

昔予之先太尉有曰使後世稱為清白吏子孫以此遺之不亦厚乎故歷數世皆以德位顯至于今幸守先訓賴以不墜夫存心以清白者惟君子為能然非先太尉則亦不能為是言也今觀祝君先大夫之貽訓若此豈非深有契於太尉公之所存者乎予既嘉君之志而君復求予言以發其義遂為之賦曰

繫君子之植立兮貴制行之彌堅懷清白以自勵兮斯素履之澹然靈臺湛以澄澈兮令聞蔚其昭宣既流芳

於往哲兮宜承式於後賢粵金華之名邦兮鬱山川其
秀麗鍾靈實于其人兮率明揚於盛世眷祝氏之多賢
兮偉夫君其特異佩先人之遺訓兮持清白而弗替力
問學以好修兮齒俊乂於上庠羌發軔於秋官兮振憲
府之風霜歷河洛湖湘之顯官兮佐閩海八郡之宏綱
踐履確以純固兮聲價煜其輝光諒所存之介特兮中
瑩澈而虛明皎乎若崑玉之潔兮炯乎若淵水之澄塵
氛之不能昧其質兮妍媸之莫或逃其形寔夫君之為

德兮迴超邁乎群英
審予懷夫先烈兮仰遺躅之未遠
紹卿相於累葉兮綿千祀而逾顯
嗟予生之已後兮承餘慶而黽勉
念惟日之孜孜兮竭微躬之蹇蹇
恐盛美之弗繼兮歎流光之荏苒
詎於予之獨爾兮諒君子以皆然
緬夫君而信美兮期同服於訓言
隨雲龍以上下兮叅鸞鷟以周旋
俾修名之有立兮庶忠孝之兩全
高軒廓其宏敞兮華扁鬱乎穹窿
懼誓言之難固兮致箴警於始終
聊攄詞於翰簡兮庶流譽之無窮

筠軒賦

三山有篤行君子陳君仲昌性嗜竹扁其退息之所曰
筠軒其子監察御史叔剛與史館纂修事乃持卷請予
題予作筠軒賦以畀之庶表予同好之意焉賦曰

披往牒以玄覽想幽致於淇園慨竹林之勝迹悵予情
之弗諼寄一賞而莫遂日輟輟於囂煩撫遺詩而載誦
益惓惓夫道學自修之言既而螭陞朝回雍容公署思
理未遑凝神息慮有客衣繡衣冠章甫披畫圖持尺素

再拜向予周旋合度受而閱之蓋其嚴君所謂筠軒縉紳之所歌詠而以求予為之賦予曰噫嘻自來薊北久與此君之不相覲矣方稽古而追思淇澳之風况展圖而感夫故鄉之植耶爰濡毫以紆思試與子而敷繹粵有勝地閩山之陽岱嶺峩峩瀨江湯湯面奇據幽天設地藏其中則修竹萬竿紛敷鬱蒼環遶垣砌蔽繁軒廊質嬋娟以閒淑性竦直而堅剛資生成於雨露傲勁節於冰霜宜君子之所愛匪羣植之可方爾其密葉含翠

輕筠凝綠森如羽蓋煜若膏沐陰翳翳其蒲林根綿綿
其連谷漏明月兮篩金結香雲兮團玉若乃涼雨乍歇
旭景弄晴天風微度戛然有聲如雲韶之迭奏若鸞鳳
之和鳴可以滌塵氛而清俗慮可以悅心耳而怡性情
此王猷所謂一日之不可無而蔣詡三徑之所由成也
然論其為德則亭亭翼翼中虛外直獨凌厲於歲寒並
後凋於松柏論其為質則鬱鬱青青凝烟遏雲苞錦籜
以絢爛滋綠綺而紛紜是蓋所謂筠乃竹之文煜乎其

璘璪者也今子之嚴君以筠名軒豈非因其質以取其
德重其植而美其文耶記禮者謂君子之有禮如竹之
有筠子之嚴君豈非欲因物以喻道而惟禮之是親耶
子之兄弟森如立竹克承親志通籍金門異日所就詎
不為南閩之光而永是軒之聞耶客曰唯唯先生有以
命我矣願言佩服勉焉思勵予亦翛然自適充然心醉
恍不知其置身淇園之濱而寄足瀨江之溪也

頌

平安南頌

有序

皇天眷命于大明開千萬世太平之鴻業太祖高皇帝
龍飛淮甸順天應人掃清六合凡際天薄海大小蠻夷
之國罔不臣服歲時貢獻雜遝後先無有少懈自歷代
以來土地之廣幅員之長未有若今日之盛者也我皇
上既嗣大統奉若天道率由舊章臣民守職夙夜惟寅
而海外諸蕃暨諸僻遠之邦素未入中國者亦莫不梯
山航海稽顙扶服奉表獻方物以得瞻覲天朝為喜幸

是蓋遠人向慕之誠寔由皇上懷柔之有其道也邇者
安南賊人黎季犛及子蒼濟惡不才滅絕倫理欺天罔
聖久蓄禍心肆虎狼吞噬之暴興狐鼠狡黠之謀賊弑
其主侵我邊境以逞兇劫奪占城要取其貢賦僭稱大
號毒痛其生民奸宄日滋寔頑益甚朝臣屢請加兵致
討皇上尚念無知遣使諭以禍福俾其自新而賊怙終
弗悛復上表欺誑請迎陳氏孫嘗避禍來京者歸立之
皇上信之不疑遣使送還本國而賊乃伏兵於途要而

殺之事聞皇上召廷臣諭之曰今四方寧靖無事干戈
惟茲安南小醜以蕞爾之地恃其險遠敢逞凶逆其可
置之度外乎羣臣咸進言曰悖逆不道國有常憲此而
不誅何以警衆於是不得已告于神明命征夷將軍率
偏師往討其罪師行皇上乃載謀載惟躬詣龍江禡纛
而遣之授以神謀睿筭仍戒其毋妄殺無辜毋毀人墳
墓廬室毋剽掠子女財帛曾未數月師駐鄰疆不疾不
徐紀律嚴明甲冑精飭旌旗炫燿鉦鼓有節諸將士感

恩慕義人懷敵愾之心奮迅鼓勇徑由坡壘破雞翎飛渡富良江直擣東都遂平西都而賊黨即時殄滅所過秋毫不犯市肆不易百姓引領望風來歸者日以萬計將臣乃敷宣恩意拯其焚溺釋其脅從遍求陳氏子孫立之已無遺類國中官吏耆老咸詣軍門請復古郡縣以隸中國設官兼治庶幾咸沐聖朝清化以脫遐荒蠻服之陋俗以永永福其子孫於無窮也捷音入奏皇上

一從所請以其地為郡縣設官兼理詔為陳氏立祠設

官典祀悉除苛虐用其才良而廩其無告者中外聞之
莫不歡欣鼓舞以為皇上恢弘基業之功光昭於祖宗
而安輯黎庶之恩偏及於天下也臣榮備員禁掖欣覩
盛事謹拜手稽首而獻頌曰

於皇太祖統一萬邦普天率土來廷來王歲時貢獻厥
篚相望如彼葵藿傾心太陽赫赫業業端拱而治嘉祥
屢臻靈物畢至文武將相視同一體龍興雲從風行草
靡南平江漢北定朔方中原晏然以耕以桑閩浙蜀越

悉歸版章定鼎金陵既盛而昌我皇繼統一遵成憲敬
天勤民登庸俊彥信賞必罰癉惡彰善皞皞熙熙恭已
南面萬里邈遠如覲目前幽側荒僻無不燭焉聰明神
聖廣運如天無微不被無鬱不宣蠢茲南夷肆逞悖逆
詭詐萬狀罔知紀極在廷臣庶請加誅殛以振皇威以
靖遠域皇帝曰吁藐焉狂獠敢肆凶頑自致天討乃命
大將以遏凶暴以整我師以控蠻島鎡仗煌煌旗旒央
央鉦鼓喧鉤師律而滅涉彼鉅海鯨波不揚平躋險阻

虎豹遁藏嗟爾蠻夷蕞爾土壤蜂蟻之衆狐貉之黨潛
形穴巢孰使狂罔天戈一麾魄褫膽喪帝戒將臣神武
不殺殲厥渠魁下人可活我師我旅毋飢毋渴繇繇翼
翼其何能遏帝戒將臣奮揚威武相其原隰深入其阻
旄倪毋辜載用輯撫雖云遐荒我疆我土將臣所至悉
諭聖恩振揚威武雷擊電奔逆豎潛伏殲拔厥根以解
倒懸以雪陳寃帝謂將臣爾訪陳氏厥角伊何求立續
嗣咨詢陪臣曰無餘裔國人盡傷歎歔怨詈帝曰吁哉

惟彼南人雖在蠻貊同乎大鈞棄而弗理禍亂彌臻滌
瑕蕩穢綱紀維新邦之耆老咸詣轅門請置郡邑維屏
維藩教以忠孝俾知彛倫耕食鑿飲同我夏人邦人有
言荷戈執戟昏迷弗恭妖狐所惑今見王師如拯焚溺
輸誠歸向剗礪洗滌邦人有言聚嘯跳踉獬犬所制莫
知其方今覲義旗正正堂堂引拔崖石置之康莊扶攜
涕泣指誓天日銷兵歸田裂幟入室祛其很暴以儆質
實世世臣妾永保寧謐將臣撫循以寬以勤征夫鼓舞

行旅歡欣歸牛休馬喜動風雲萬姓咸曰吾皇至仁捷
書入奏大賚勲庸功逾銅柱勒碑崇崇凡在戎行咸預
顯融莫不稽首惟皇之功惟皇之功克紹太祖惟皇之
基超軼前古惟皇之德上侔堯禹於萬斯年作民父母

河清頌

有序

臣比者伏觀高平王平陽王奏蒲之河津縣黃河水清繼而
二王奉表賀未幾秦王復來奏亦繼奉表賀億兆臣民莫不
忻忭臣聞天降嘉應黃河水清今皇上御極統治萬方拯生

民於墊溺致諸國之來廷海宇清寧庶類咸若而河水澄澈
雖甘露醴泉景星慶雲不是過也況夫野蠶吐絲嘉禾呈穗
騶虞獻祥神龜表孝休禎疊臻是皆皇上仁孝誠敬有以上格
于天心故天昭貺之如此者也今黃河水清延數百里此又莫
大之瑞曠世之所罕逢昔漢獲白麟赤鴈芝房寶鼎之類固
以著為樂歌薦之郊廟若茲嘉祥其可無述作乎謹拜手稽
首而獻頌曰瞻彼河流浩浩湯湯來自西極源于天潢奔駛
蕩瀟厥勢混茫道雍經冀歷兗踰梁逶迤中原晝夜弗止逝

者如是瞬息千里黃流一清粵歲三千適應其期夫豈偶然
聖神御極德合義軒川嶽效靈諸福駢臻騶虞獻祥神龜表
孝復覩河清實符至道以應太平以彰治效萬姓胥慶歡呼
舞蹈帝德如天績紹平成湛然止水昭茲清明蒲陽之堦河
津之邑居民競觀奔走原隰昔猶罕聞今喜親覲欣忭蹈舞
樂沾聖澤龍門巍哉河流分中千古萬古神禹之功猗歟吾
皇德洽恩隆拯民墊溺曰禹實同天眷聖皇福覃華夏瑞協
前聞龜書龍馬於萬斯年慶延宗社微臣獻頌以配風雅

御編為善陰隲書頌有序

洪惟皇上以天錫勇智之資銳意於古昔聖帝明王之
治夙夜孜孜以振起斯文為已任以敦德勸善為天下
先即位之初首詔設科幸國學修大典崇獎儒術興行
禮義由是詩書絃歌之化衣被六合無有遠邇翕然大
同人莫不曰天下已治風俗已淳惟皇上謙冲之心尚
以為未足乃以聖人之道具載六經燔滅於秦穿鑿於
漢晦盲否塞千五百年逮至宋之諸儒雖已發明表章

之然其興義微旨尚或有遺不無詳此畧彼之患於是特發宸衷命儒臣類而纂之授以成法備載聖賢之言蒐輯諸儒之說由是六經四書之旨聖人之道粲然而復明書成名曰性理大全遂命刻梓賜之羣臣頒于天下使學者一覽莫不豁然貫通咸有以造乎闡奧以為聖賢教人之言雖無不備若曰積善之家必有余慶積不善之家必有余殃又曰作善降之百祥作不善降之百殃又曰德惟一動罔不吉德二三動罔不凶又曰惟

天陰隲下民其善惡之理警戒之意不一而足而凡古人為善獲報者亦皆載之簡冊歷歷可指然而簡籍浩穰難以披閱垂拱之暇乃取古人有陰隲而享其福慶顯有明效者彙次世代系其姓氏著其事蹟仍各為論斷以附其後且為詩以列之凡一十卷名曰為善陰隲頒示四方家傳人誦俾舉目之際莫非為善之事游心之頃莫非種德之機於是罔不躍然興起樂於為善而思有以享其報也皇上之所以陰隲於斯世斯民而納

蠻貊之率俾近悅遠來萬幾餘閒怡神稽古六龍捧御
寵顧延英上深軫於天心頻垂矜於寒士廣其室宇遂
涼燠之攸宜給以饗飧兼什器之咸備凡百所用靡一
弗周同乾坤覆載之恩踰父母生成之賜是皆皇上聖
仁廣大明睿照臨溥德澤於萬方施由侍從昭禮文於
千載高出古今所以致海宇之雍熙所以隆皇圖於永
久臣等深慙末學幸際明時被沐恩榮匪名言之可罄
策勵駑鈍豈報效之敢忘端秉寅誠恭陳申謝龍翔鳳

翫瞻五采於中天春育海涵祝萬年之聖壽

文敏集卷八